

Evening Dogri (NSD)

31-May 2026

खास खबरां

1. प्रधानमंत्री नरेन्द्र मोदी होरें आखेआ ऐ जे सरकार देसे दियें नमूली धरोहरें दे संरक्षण राक्खी-हिफाजत लेई हर संभव कोशशां करा रदी ऐ। उ'नें नीदरलैंड दे अपने हालिया दौरें दौरान प्राचीन चोल काल दियें परानियें ताबें दियां प्लेटां भारत गी वापस पताने दा खास जिकर किता।
2. चीफ ऑफ डिफेंस स्टॉफ लेफ्टिनेंट जनरल एन.एस. राजा सुब्रमणि होरें आखेआ ऐ जे भारती हथ्यार बंद बल देशै दी संप्रभुता ते खेत्तरीय अखँडता दी राक्खी-हिफाजत आस्तै वचनबद्ध ऐ।
3. एडमिरल कृष्णा स्वामीनाथन होरें नौसेना प्रमुख दे तौरा पर कार्य-भार संभालेआ।
4. हिमाचल प्रदेश दे चम्बा जिले च इक डूंगे नाले च इक गड्डी दे डिग्गने करी ओहदे च सोआर सब्भै 8 जनें मृत घोषित करी दिते गे न।
5. अमरिका दे राष्ट्रपति डोनाल्ड ट्रम्प होरें आखेआ ऐ जे अमरीका ईरान कन्नै परमाणु समझौते दे बड़े नेड़े ऐ- उ'नें चेतावनी दिती ऐ जे जेकर गल्लबात तोढ़ नैई चढोग तां फौज दी कारवाई इक विकल्प रौहग।
6. बैडमिंटन च भारतीय जोड़ी सात्विक साईराज- रंकी रेडडी ते चिराग शेटी ने अज्ज सिंगापुर ओपन दे मर्दे दे डबल फाइनल च जित्त हासल कीती ऐ।
7. IPL क्रिकेट दे फाईनल च गुजरात टाइटन्स ते रॉयल चैलेन्जर्स बेंगलुरु अज्ज शामी अहमदाबाद च इक रोमांचक खिताबी मकाबले आस्तै पूरी चाल्ली तयार न।

<><><><><><>

PM -Man Ki Baat

प्रधानमंत्री नरेन्द्र मोदी होरें आखेआ जे सरकार देसे दियें अनमोल धरोहरें दे संरक्षण राक्खी-हिफाजत लेई लगातार कोशटां करा करदी ऐ। अज्ज आकाशवाणी थमां अपने माहवार रेडियो कार्यक्रम –“मन की बात” च लोकें कन्नै अपने विचार सांझे करदे होई प्रधानमंत्री होरें छत्तीसगढ़ दे मल्हार च ज्ञान भारतम अभिज्ञान तैहत होई दी इक्क महत्वै आहली खोज बारे दस्सेआ।

प्रधानमंत्री होरें हाल च गै नीदरलैंड दे अपने दौरें दा भी जिकर कीता- जित्थे उ'नें इक्क टकोहदे समारोह च चोल काल दियें परानियां ताबें दियां प्लेटां प्राचीन ताम्र-पट्टिकां भारत गी परताइयां। अपने माहवार रेडियो कार्यक्रम दौरान प्रधानमंत्री नरेन्द्र मोदी होरें देसै दे लोकें

अग्गे अपील कीती जे ओ चला'रदे गर्मियें दी ऋतै च पूरी सावधानी बरतन ते इस सरबंघै च बक्ख-बक्ख सरकारी मैहकमें पास्सेआ जारी दिशा-निर्देशें दी पालमा करन।

प्रधानमंत्री होरें लोकें गी गर्मी थमां बचने लेई आम पन्ना- मट्टा- लस्सी-सत्तू शरबत बेल पन्ना- पनाकम- नीरमोर- सांथरम- सोल कढ़ी ते कोकम शरबत जनेह बक्ख-बक्ख तरल बदार्थ पीने दा सुझा दिता- जेडे देसै दे बक्खरे-बक्खरें हिस्सें च रिवायती ढंगै कन्नै बनाए जंदे ना। प्रधानमंत्री होरें देस भरै च अम्ब दियें किस्में बारे गल्ल कीती ते अम्बै दी भारती पैदावार गी वैश्विक बाज़ार तगगर लेई जाने आस्तै करसानें दी तारीफ कीती। प्रधानमंत्री होरें झारखंड दी राजधानी रांची च हाल च गै आयोजित राश्ट्री सीनियर एथलेटिक्स महासंघ प्रतियोगिता बारे बी गल्ल कीती। एदे च तकरीबन 800 एथलीटें हिस्सा लैता हा। श्री मोदी होरें गुरिंद्र वीर सिंह ते अनिमेष कुजूर कन्नै गल्ल भी कीती- जिनें सौ मीटर द्रौड़ च रिकार्ड त्रौड़ हे। प्रधानमंत्री होरें खगोल क्लबें च बद्दार्दी दिलचस्पी दे इलावा देसै दे बसनीकें गी राश्ट्र निर्माण च योगदान दी बी अपील कीती।

<><><><><><>

New CDS

चीफ ऑफ डिफेंस स्टॉफ CDS लेफ्टिनेंट जनरल N.S. राजा सुब्रमणि होरें अज्ज आखेआ ऐ जे नमियें काडुं दे उपयोग कन्नै फोज दी क्षमताएं दे विकास च होर मती तेजी औगा। नमें नियुक्त होऐ दे CDS दे तौरा पर कम्मभार संभालने दे मगरां मीडिया गी सम्बोधित करदे होई जनरल सुब्रमणि होरें आखेआ ऐ जे हथ्यार बंद बलें देशै दे हित दी रक्षा करने आस्तै लगातार बेजोड़ प्रदर्शन कीता ऐ। नमें नियुक्त होऐ दे प्रमुख रक्षा अध्यक्ष लेफ्टिनेंट जनरल N.S. राजा सुब्रमणि होरें गी अज्ज नमीं दिल्ली दे साउथ ब्लॉक च गार्ड ऑफ ऑनर दिता गेआ। उनें राश्ट्रीय युद्ध स्मारक पर बी फुल्ले दी माला अर्पित कीती।

<><><><><><>

Loard Budha Relics

भगवान बुद्ध हुंदे पवित्र अवशेषें गी ब्हाई सेना दे विमान राहें दिल्ली थमां मंगोलिया भेजेया गेआ ऐ। रक्षा मंत्रालय ने इक ब्यानै च आखेआ ऐ जे इस विमान ने रातीं डुआरी भरी ही ते कल बड्डुलै 11 बज्जियै 25 मिंटे पर मंगोलिया पुज्जी गेआ हा।

<><><><><><>

W.B Governor

पच्छिम बंगाल दे राज्यपाल R.N. रवि होरें आखेआ ऐ जे भारत-बंगलादेश दी खुल्ली दियां सरहद्दां राष्ट्रीय सुरक्षा आस्तै खतरा ना। उ'नें पूर्वोत्तर गी बाकी मुल्खें कन्नै जोड़ने आहले चिकन नेक गलियारे गी मजबूत करने पर जोर भरेआ। R.N. रवि होर अज्ज सिलीगुड़ी च पत्रकारें आस्तै आयोजित नारद सम्मान समारोह च हिस्सा लैने आस्तै बागडोगरा पुज्जे हे। उत्थें मीडिया आहलें कन्नै गल्लबात करदे होई उ'नें आखेआ जे भारत-बांगलादेश बन्ने दा इक संवेदनशील हिस्सा ऐ- जेहदे पर बरे थमां घेराबंदी नैई होई दी ऐ- एह हिस्सा राष्ट्रीय सुरक्षा आस्तै खतरा बने दा ऐ।

<><><><><><>

New Chief of Naval Staff

एडमिरल कृष्णा स्वामीनाथन होरें अज्ज 27में नौसेना प्रमुख दे तौरा पर कार्य-भार संभालेआ ऐ। उ'नें एडमिरल निदेश के. त्रिपाठी हुंदी थाहर लैती ऐ। एडमिरल स्वामीनाथन होरें कमान संभालने दे मगरा मीडिया गी सम्बोधित करदे होई आखेआ ऐ जे भारतीय नौसेना राष्ट्र दे हितें दी रक्षा लेई सतर्क ऐ ते खेत्तरीय सुरक्षा बनाई रखने आस्तै सक्रिय तौरा पर तैनात ऐ। उ'नें आखेआ ऐ जे नौसेना गी आधुनिक तकनीकें कन्नै लैस कीता जाहग। इस मौके पर ओहदा छोड़ा करदे- नौसेना प्रमुख एडमिरल दीनेश के. त्रिपाठी होरें आखेआ ऐ जे देशै दी नौसेना दी अगुआई करना उन्दे आस्तै बड़ी गौह आहली गल्ल रेही ऐ। उ'नें इब्बी दस्सेआ ऐ जे पच्छिम एशिया दी मौजूदा स्थिति दे बश्कार बी भारतीय नौसेना दी प्रतिबद्धता ते पेशेवराना अंदाज जारी ऐ।

<><><><><><>

HP Road Accident

हिमाचल प्रदेश दे चम्बा जिले च इक डूंगे नाले च डुब्बी गेदी इक गड्डी च सोआर सब्भै 8 जनें मृत घोषित करी दिते गे ना। एह हादसा दूर-दरेडी चूरा उप-डिविजन च बैरा गढ़ सच पास किल्लर सिडकै पर होआ हा। पुलसै दस्सेआ ऐ जे इक कार जेदे च सैलानी बैठे दे हे- 29 मई दी अद्दी रातीं'लै इक डूंगे नाले च जाई पेई। बड़े मुश्कल हालात च व्यापक तपाशी ते बचाव अभियान चलाया गेआ ते प्रशासन नै हादसे आहली थाहरै थमां 8एं लोथां बरामद करी लैतियां। इंदे चां 7 सैलानी छत्तीसढ़ दे ना। कार दे ड्राइवर दी बी मौत होई गेदी ऐ। पुलसै दस्सेआ जे एह सैलानी डलहौजी दे इक होटल च ठैहरे दे हे। 29 मई गी ओह सच पास दिक्खन गे पर संजा लेई परतोए- होटल प्रबंधन नै पोलीस गी सूचना दिती जेहदे मगरा तपाशी अभियान चलाया गेया।

Saket Ace

कल संज्ञा दक्खन दिल्ली दे साकेत मेट्रो स्टेशन दे कश इक व्यवसायिक इमारत दे ढौहने कन्नै त्रंऊ लोकेँ दी मौत होई गई। AIIMS अस्पताल थमां थोई दी जानकारी मताबक 11 लोकेँ गी जय प्रकाश नारायण एपेक्स ट्रॉमा सेंटर च इलाज आस्तै आंदा गेआ हा। इंदे चा त्रौं गी अस्पताल च पुज्जदे गै मौए दा घोषत करी दिता गेआ हा। पंजेँ लोकेँ दा अस्पताल च इलाज चला करदा ऐ ते त्रंऊ गी इलाजे दे मगरा घर पेज्जी दिता ऐ। दिल्ली दी मुख्मन्त्री रेखा गुप्ता होरेँ अज्ज दक्खन दिल्ली च घटना आहली थाहरा दा दौरा लाया ते चला रदे राहत ते बचाऽ कम्मों दी समीक्षा कीती।

<><><><><><>

PIB –Fake Message

सरकार नै सोशल मीडिया पर फैले दे इक फर्जी सनेह दा खंडन कीता ऐ- जेहदे च दावा कीता गेआ ऐ जे इंडिया पोस्ट- डॉक सेवा गिफ्ट योजना दे तैहत तौहफे जां इनाम देआ रदी ऐ। PIB दी फैक्ट चैक यूनिट नै आखेआ ऐ जे एह वीडियो फर्जी ऐ ते इस गल्लै गी साफ कीता ऐ जे इंडिया पोस्ट इस चाल्ली दी कुसै बी डॉक सेवा गिफ्ट आफर- इनाम देने आहली स्कीम जां लक्की ड्रां कन्नै कोई बाह-बास्ता नैई ऐ।

<><><><><><>

World No Tobacco Day

तंबाकू दे इस्तेमाल दे खतरे दे खलाफ जागरूकता पैदा करने लेई अज्ज विश्व तंबाकू निषेद ध्याड़ा मनाया जा'रदा ऐ। एह ध्याड़ा विश्व सेहत संगठन WHO आस्सेआ तंबाकू दे इस्तेमाल गी खत्म करने आस्तै इक वैश्विक पैहल ऐ। इस बरे दा विशे सार ऐ- एहदी अपील गी उजागर करना ते निकोटीन ते तंबाकू दी लत्त दा मुकाबला करना ऐ।

<><><><><><>

Udhampur Youth

जम्मू-कश्मीर दे उधमपुर दी नोजोआन पीढ़ी डिजिटल क्रांति गी अपनाइयै देस भर दे लोकेँ गी अपनी प्रतिभा रचनात्मकता ते संस्कृति दी झलक दस्सने लेई सोशल मीडिया प्लेटफार्मेँ दा इस्तेमाल करा करदे ना। साढ़े जिला संवाददाता दी रिपोर्ट ऐ जे कदेँ मुख्म तौरा पर सरकारी नौकरी दे मेदवार बनने आहलें नोजोआन हुंन कंटेट क्रियेटर- गायक ते इन्फ्लुएंसर

दे तौरा पर उभरा करदे न। स्मार्ट फोन ते इंटरनेट राय ओ मकामी परम्पराएं- सनाकड़ियें थाहरें ते प्रेरणा देने आहलियें कहानियें गी सांझा करा'रदे न ते नेकां नौजोआन एदे राय पंछान ते पैहा दौने कमा'रदे न। टकोहदा करियै युवा महिलाएं दा गलाना ऐ जे कंटेट बनाइयै उन्दा अपने पर बसा-भरोसा बदेआ ऐ।

<><><><><><>

Self Enumeration

2027 बरे आहली मरदमशुमारी दे पैहले गेड़ तैहत प्रदेश च नागरिकें आसेया आंपु ऑनलाईन अपना ब्योरा दर्ज करने सरबंधी Self Enumeration दी प्रक्रिया अज्ज संभा रदी ऐ ते घर-घर जाइयै लोके थमां आंकड़े कठेरने सरबंधी House Listing आहला अभिजान कल्ल संगारे थमां रम्भ होई जाहगा। अधिकारियें दस्सेआ जे 30 जून तगगर एन्यूमिरेटर ते सुपरवाइज़र घर-घर जाइयै घरें ते आबादी मत्तल्लक स्टीक आंकड़ें दर्ज करडन। बसनीकें गी अपील कीती गई ऐ जे ओ सरबंधत अमले दा सहजोग करदे होई स्टीक जानकारी दर्ज करोआन।

<><><><><><>

Rail Traffic Restored

पिच्छले बरे हाड़ें करी कठुआ-माधोपुर बश्कार बुरी चाल्ली प्रभावित होए दे रेलवे पुल नम्बर 17 पर चला दा मरम्मती आहला कम्म मुकम्मल होई गेआ ऐ। हून औने ते जाने आहले दमै रस्ते भ्लेआं ठीक होई गेदे न ते पैहली जून थमां जियां के तय कीता जाई चुके दा ऐ- रेल सेवा ब्हाल करी दिती जाहगा। केई मुख् रेलगड्डियां फही इस रस्तेआं औना-जाना शुरु करी देडन। गर्मियें दियें छुट्टियें दे रश दे प्रबंधन लेई चोनमिएं रेलगड्डियें च बाददू डब्बे लाए गे न। इस रेल पुलै दे ब्हाल होने मगरा लोके गी आओ-जाई च सखाल ते होग गै- माल –समेयान दी ढोआई- वाणिज्य गतिविधियें ते सेना दे माल-समेआन दी आओ-जाई च बी मदद थ्होग।

<><><><><><>

Trump-Iran

अमरीका दे राष्ट्रपति डोनाल्ड ट्रम्प होरें आखेआ ऐ जे अमरीका- ईरान कन्नै परमाणु समझौते दे बड़ा नेडे ऐ- पर उ'नें चेतावनी दिती ऐ जे गल्लबात तोड़ नैई चढोग- तां फौज दी कारवाई दा विकल्प खुल्ला रौहगा। इक इंटरव्यू च ट्रम्प होरें आखेआ ऐ जे उन्दे प्रशासन दी प्राथमिकता एह यकीनी बनाना ऐ जे ईरान गी कदे बी परमाणु हथियार नैई बनान दिता

जाहगा। उ'नें दावा कीता ऐ जे ईरान ने इस गल्लै पर सैहमती जताई ऐ जे ओह परमाणु हथ्यार नेंई बनागा। उ'नें इस गल्लै पर जोर भरेआ ऐ जे तरक्की होआ रदी ऐ।

<><><><><><>

CM JKNC Meeting

जम्मू-कश्मीर दे मुखमंंत्री उमर अब्दुल्ला होरें औंदी 3 जून गी जम्मू-कश्मीर नैशनल कांफ्रेंस दे विधायकें दी इक बैठक सद्दी ऐ- तां जे संगठनात्मक ते विकास कन्नै जुड़े दे बक्ख-बक्ख मामलें दी समीक्षा कीती जाई सकै। उपमुखमंंत्री सुरिन्द्र चौधरी होरें गलाया जे बैठक दौरान बक्ख-बक्ख चुनावी हलकें च सरकारी पहलकदमियें ते तरकेयाती कम्में दे इलावा आम लोकें कन्नै जुड़े दे मुद्दें पर चर्चा करने दा मौका थ्होग। उ'नें गलाया जे मीटिंग च रोज़गार पार्टी दे घोषणा-पत्र च दस्से गेदे वादें गी पूरा करने ते भविक्ख दियें प्राथमिकताएं पर बी गल्ल होने दी मेद ऐ। श्री चौधरी होरें बैठक गी इक्क नियमित संगठनात्मक कारवाई दस्सेआ- जेदा मुख मकसद तरक्की दी समीक्षा करना ऐ।

<><><><><><>

LoC Poonch

बन्ने पर बनाई गेदी बाड़ शा अगगे बस्सने आहलें बनसीकें दी आओ-जाई गी सखल्ला करने आहली भेठा इक महत्वै आहली गैंह तैहत- सेना नै जम्मू-कश्मीर दे पुंछ जिले च कब्जा रेखा द्वारें पर इक अति आधुनिक Scanning संयंत्र लेन दे कन्नो-कन्नो आधार पर अधारित आओ-जाई आहले सरिस्ते गी स्थापित कीता ऐ। साढ़े जिला संवाददाता दी रिपोर्ट मुजब इस डिजिटल सरिस्ते राहें- फौरी सुरक्षित तरीके ने शिनाख्त कीती जाई सकोग- जेहड़े नै लोकें गी मता इंतजार नेंई करना पौग। गैर-कनूनी तरीके कन्नै चीजें-बस्तें ते हथियारें दी तस्करी रोकने लेई भ्लेआ अज्जै-कल्लै आहले Scanning उपकरण बी लाए गे न।

<><><><><><>

Weather

मौसम मैहकमे नै आखेआ ऐ जे औने आहलें चंऊ-पंजें दिनें च दक्खन पच्छिम मानसून दक्खन पूर्वी अरब सागर- लक्षद्वीप- केरल ते तमिलनाडू दे किश हिस्सें च अगगे बधी सकदी ऐ। मौसम मैहकमे नै इब्बी जानकारी दिती ऐ जे ओडिशा- नागालैंड- मणिपुर- मिज़ोरम- त्रिपुरा ते लक्षद्वीप च तेज ब्हाऊ कन्नै बरखा बरी सकदी ऐ। अगले किश दिनें च अरुणाचल प्रदेश-

असम- मेघालय ते तटीय कर्नाटक च किश थाहरें पर बिज्ज मिलकने दे कन्नै-कन्नै गरज-चमक दी बी शैंका जताई ऐ। दिल्ली- हरियाणा ते चंडीगढ़ च बी कल्लै तगर किश थाहरें पर बिज्ज मिलकने ते तेज अंधी-झक्खड़ झुल्लने दी पेशगोई कीती गई ऐ।

<><><><><><>

Badminton

चिड़ी-छिक्के च भारती मर्दे दी जोड़ी सात्विक साईराज- रंकी रेड्डी ते चिराग शेटी नै अज्ज सिंगापोर ओपन टूर्नामेंट दा फाईनल जिती लैता ऐ। भारती जोड़ी नै इंडोनेशिया दी जोड़ी- मोहम्मद शोहिबुल फिक्री ते फजर अल फियान गी 18-21/21-17/21-16 कन्नै फाईनल मैच च हराई ओड़ेआ। एह टूर्नामेंट जित्तने कन्नै बड़े चिरै दी निहालप खत्म होई ऐ। पिच्छले दऊ बरे च ए भारती जोड़ी दा पैहला Title ऐ ते नौमां विश्व टुअर Title ऐ।

<><><><><><>

IPL

IPL क्रिकेट दे फाईनल च गुजरात टाइटन्स ते रॉयल चैलेंजर्स बेंगलुरु अज्ज शामी अहमदाबाद दे नरेन्द्र मोदी स्टेडियम च आपसी मुकाबले आस्तै पूरी चाल्ली कन्नै त्यार ऐ। दमें टीमां ट्रॉफी दे बड़ियां नेड़े न- जेहदे करी दमें टीमां फाइनल मैच च अपनी पूरी ताकत दा फायदा चुक्कने दी कोशिश करडन। गुजरात टाइटन्स ने शुरुआती मैचें च रॉयल चैलेन्जर्स गी हराया हा- पर RCB ने पिच्छले बरे इस्सै मैदान च पैहला IPL जित्तने दा खिताब हासल कीता हा। RCB ने शानदार प्रदर्शन कीता ऐ ते त्रंऊ दिनें दी ब्रेक दे बाद मगरां अज्ज फाईनल च पुज्जी ऐ। विराट-कोहली हुंदी अगुआई च उंदी टीम दी बल्लेबाजी टूर्नामेंट च सब्भनें थमां शानदार बल्लेबाजी रेही ऐ। बॉलिंग च भुवनेश्वर कुमार जोश हेज़लवुड नमीं बॉल कन्नै अहम प्रदर्शन करने आहला खडारी रेह न। उत्थे गै दूआ बक्खी शुभमन गिल हुंदी अगुआई आहली गुजरात टाइटन्स शीर्ष दंऊ च थाहर हासल कीती ऐ ते क्वालीफायर-1 च हार दा सामना करने दे मगरा फाईनल च दाखल होई ऐ। दमें टीमां अपना-अपना दुआ आई.पी.एल दा खिताब जित्तने दी कोशिश च न। गुजरात टाइटन्स ने 2022 च पैहली IPL ट्रॉफी जिती ही ते RCB पिच्छले सीज़न च जिती दी ट्रॉफी दा सफलतापूर्वक बचाऽ करने दी कोशिश करा रदी ऐ।

<><><><><><>